

COSMOGLOTTA

Official organ del OCCIDENTAL-UNION

Redaction e Administration: INSTITUTE OCCIDENTAL CHAPELLE (Vd) Svissia

COMITÉ
DE
REDACTION:


Prof. E. de WAHL
(Estonia)

Dr Bertil BLOMÉ
(Svedia)

Prof. H. PASMA
(Tchecosl.)

Dr H. NIDECKER
(Svissia)

Nr. 111
NOV. - DEC.
1936



Pro quo li nomine de "Occidental"?



Li concordie inter li popules, li comercie, li turism, li scientie postula sempre plu un **lingue auxiliari neutral**, facil a aprender e quel ne vulnera li susceptibilitas national. Ma, de un part, **li latin**, mult tro desfacil por li popul ne es plu capabil servir al modern tecnica.

De altri part, li artificial systemas proposit til hodie (Esperanto, Ido) ne ha successat imposir se malgre enorm efforties pro que nor **civilisation repugna un lingue con aspect artificial**.

Un demi secul de experienties ha pruvat que nequande Europa va accepter un **lingue quel choca su sentiment linguistic**.

Esque on va definitivmen renunciar a ti medie tant desirat de intercomprension inter popules?

No! In ultim tempore un erudit estonian, prof. Edgar de Wahl, pos **30 annus de labores e experienties** ha monstrat per

OCCIDENTAL

que si on prende **li paroles international sin deformar les** on obtene un idioma immediatmen comprensibil al tot munde civilisat.

OCCIDENTAL ES LI MODERN LATIN

Scientistes, comerciantes, turistes, colectionistes del tot munde, li sol lingue in quel omni hom civilisat comprende vos es

OCCIDENTAL

Occidental es li max facil lingue del munde. Su minimal gramatica, su regulari e totalmen international parol-formation es insuperabil. Ples provar usar Occidental in vor relationes e vu va vider li effecte.

CURT GRAMATICA DE OCCIDENTAL

Infinitives : Finale -r. Ex. : fini-r, ama-r, deve-r.

Adjectives : Finale inobligatori -i. Ex. : micri.

Adverbies : Finale -men. Ex. : visibil-men, regulari-men.

Present del verbes : li radica sol. Ex. tu fini, tu ama, tu deve.

Passate : Finale -t. Ex. : tu fini-t, il ama-t, noi deve-t.

Passate composit : per auxiliare ha-r. Ex. : tu ha finit, noi ha videt.

Future : auxiliare va. Ex. : Tu va finir, il va amar, etc.

Conditionale : auxiliare vell. Ex. : tu vell finir, yo vell prender.

Imperative : ples, o li radica sol. Ex. : Ples finir! Fini!

Participie present : -nt. **Participie passat** : -t. **Gerundive** : -nte.

Masculin : -o. **Feminin** : -a. **Plurale** : -(e) s.

Un sol **articul** definit : li. Adjectives invariabil.

Pronomines personal : Yo, tu, il, illa, it ; plurale : Noi, vu, ili.

Contene: *A. Meillet ha morit.* — *Dr Vanorni e Karel Scheinpflug e li lingue int.* — *Li question del prefixe -in.* — *Li cobold marin.* — *Li batysfere.* — *Un nov mestiere.* — *Vocabularium del Navigation.* — *IALA va studiar li derivation.* — *Un novita in li lingue int.* — *Cronica.* — *Index.*

A. Meillet ha morit

In septembre 1936 ha morit in Paris li grand linguist Antoine Meillet, autor de numerosi e important libres pri linguistica.

Por nos, interlinguistes, ti disparition es un eveniment, nam Meillet esset un del rar linguistes, quel interessat se al international lingue e emfasat su utilitá e necessitá. Ja ante 30 annus il monstrat su sympatie al problema quel ocupa nos; pro to Couturat petit le intrar in li «Comité del Delegation por li adoption de un lingue international» in 1907. Meillet refusat, ma inviat a Couturat pluri lettres, queles noi va publicar plu tard e queles contenet precios consilies pri li lingue a selecter.

In prim Meillet recomendat con insistentie **refusar li acusative de Esperanto** e, quande il ricevet li unesim gramatica de Ido, il strax expresset su deception a Couturat, pro que li «lingue del Delegation» **hat conservat li acusative in casu de inversion.**

In 1918, Meillet publicat su celebri libre «Les langues dans l'Europe nouvelle» in quel il consacrat un capitul in favor del international lingue. Secun Meillet, un tal lingue posse perfectmen viver, ma il mult regreta li defectes de Esperanto. Ti judica confirmat ti, quel il hat inviat privatmen in 1907 a Couturat in un lettre quel yo possede:

«Esperanto have grand merites, ma su actual success es regretabil de un later, pro que si it es definitiv, to va esser li success de un solution passabilmen defectosi.»

Cosmoglotta de septembre 1933 ha insertet un extract de ti ovre, traductet in Occidental per sr. Bertil Blomé (Svedia).

In li dominia purmen linguistic, Meillet provat principalmen reconstruer li antiqui oriental lingues. Departente de ti studie, il successat extraer li filosofie del linguistic scienties. Anc il ha bon monstrat li raportes existent sempre inter li lingue de un popul e ti popul self.



A. Meillet.

R. Bg.

Quo di Prof. Dr. h. c. Otmar Vanorny pri li Lingue international

Yo visitat prof. Dr. h. c. Otmar Vanorny, quel vive in nor cité in pension pos un fructosi labor, por audir de ti ci famos tchec traductor ex lingues classic e conossor del classic literatura, su opinion pri li problema del lingue international. Ci yo permisse me presentar vos su paroles, por publication de queles Dr. Vanorny me ha autorisat :

« Yo nequande cuidat pri li question de lingue international. Solmen quando yo fat conossentie de Occidental, mi interesse esset evocat. Yo vide, que Occ. es composit precipue ex t. n. « foren paroles » (vocabules), conosset de omni educate. Li latin es li fundament del occidental cultura, latin paroles per li merite del Christianity esset introductet ne solmen in li romanic, ma anc in li germanic, slavie e altri lingues. Ili devenit international. Anc altri lingues contribuet al vocabularium international e omni ti ci expressiones forma hodie un rich collection usat chascun die in li scientie, jurnalistica, literatura etc.

Li autor de Occidental utilisat les quam fundament de su lingue e li vocabularium de Occidental es in max grand parte un collection de generalmen conosset paroles, quel on deriva regularimen per un tre apt systema derivatori. Occidental fa li impression de un tot natural lingue.

*Li international intercomprehension es extrem necessari e un unitari auxiliari lingue deve focalisar it. Un lingue international deve satisfar ne solmen in interchange de post-marcas, ma anc in li scientie, diplomatie, etc. E just in ti egard noi ne fat ni un passu ad-avan. **Li aversion contra un « artificial » lingue international posse esser victet solmen per un natural structura** de un tal lingue. It va esser un lingue, creat sur li sam base, quam Occidental, i. e. sur li base del maximum de internationalitá, naturalitá e facilitá.»*



It es paroles de un aconosset classic filologo, paroles queles injoya nos e dí, que noi marcha li correct via. Mult tchec gazettes ha publicat ti opinion e li bon conosset literator tchec, sr. Scheinpflug, scri in li revue « Prítomnost » : « Si un tam profund conossor et entusiasmat amator de classic lingues, quam prof. Dr. Vanorny ha scrit, que « Occidental fa li impression de un tot natural lingue », tande to es un reconossentie, quel vale plu quam un aurin medallie de aquel exposition universal. »

Jaroslav Vozenilek, Tchecoslov.

LI TCHEC AUTOR KAREL SCHEINPFLUG E LI INTERNATIONAL LINGUE



K. Scheinpflug.

Li max apreciat tchec semanal revue «*Přítomnost*» (Presentie) ha publicat in su nro 32 de 12 august 1936 un long articul intitulat «*Mezinárodní jazyk*» (International lingue). Su autor es li conosset tchec journalist e autor *Karel Scheinpflug*.

Ti articul pri l. L. atesta su profund interesse pri li problema del LI, un acut penetration in li essentie del thema; it es anc scrit in excelent maniere. Li singul partes es intitulat quam secue : Per li caos de lingues ne esset punit solmen li Babyloneses, li desir ye li unic lingue, volapük, esperanto, ido, occidental e pri li futur possibilitás del int. lingue. Li autor accentua li

absolut superioritá de Occidental contra Esp. e il di : « **Occidental in comparison con Esperanto es un progress tam grand, quam unquande esset Esperanto in comparison con Volapük.** » Poy il dí : « On posse designar Occ. quam un lingue int. capabil del vive, nam it es un lingue facil por un grand numer de homes, it es expressiv, bellsonant e capabil del progressent evolution, pro que it ne esset creat secun li aprioristic artefat regules, ma cultivat ex li natural lingues in simil maniere, per quel li jardineros crea li nov species de plantes. » In li parte pri li possibilitás del L. I. li autor dí, que it va esser necessari, que li autores del LI mey restricter por li proxim témpore su scopes. « Si un tal lingue vell devenir almen li comunicativ lingue del Europa, it vell far tre mult por li approximation del european nationes e augmentation de lor comercial e cultural relationes. Li general divulgation del L. I. vell aportar al homanité li advantages, queles noi hodie ne posse apreciar. » Quam specimen del lingue li autor cita li articul pri li election del nov president in Tchechoslovakia, quel aparit in « Occidental bulletin » li 1 januar a. c.

Li nro 38 del 23, septembre contene denov un articul Sr Karel Scheinpflug : « Denov pri li international lingue ». Il mentiona li grand númer de lettres pro e contra, quel li redaction ha recivet de espistes e de occidentalistes pos li aparition de su articul e continua : « Li majorité de espistes es tre indignat per to, que alqui hom ha prendet li libertá submisser Espo al critica, quam si it vell esser un intuchabil sacrament. Vu posse criticar li arte, li scientie, li politica e li sportiv actiones ; ma ne audacia far aquel reprocha al artificial lingue de dr. Zamenhof ! » Pri li trumpetat 2 miliones espistes li dí : « Li fidel calculation de espistes in 1928 (fat per statal german institute por espo, Germana Espo Instituto, sub li direction del prof. Dieterle de Leipzig) ha certificat 126.562 de espistes in 7000 locos de 120 landes ; Espo va celebrar pos un annu li 50-ésim anniversarie de su intrada in li public vive ; li suposit 2 miliones de adherentes, recrutat in 50 annus, vell far solmen 0.2 % ex li numer (nombre) de Europeanes, Americanes, Japaneses e Chineses, inter queles li propaganda espistic ha laborat... Solmen ti homes comprende E., queles ha aprendet it, ma occidental es comprendet de miliones de homes conosent aquel romanic lingue. Occidental ne exclude li homes necultivat, ne-educat, nam chascun occidental-Europeano e Americano solmen un poc cultivat comprende it inmediatmen, pos prim visu ; **ma E. exclude de su usation li homes con plu profund cultivation linguistic** e to es quo frena su developation, nam just ti homes, queles have li max grand international contact, ignora ti intercomunicativ medie pro su primitiv inmaturitá.

In li fine il cita li enunciationes de prof. Sydow e Barány pri Occ. e il dí : « *Si un tal profund conossor e entusiasmator amator de classic lingues, prof. dr. Otmar Vanorny, ha scrit, que « occidental fa li impression del natural lingue », ergo it es un laudation, quel vale plu quam un aurin medaille de aquel universal exposition.* Yo regreta, que yo ha incoherat per mi articul li senioras e seniores espistes, nam yo aconosse, que ili per su cultivation de espo ha recrutat li merite por un fase de evolution del international auxiliari lingue. Ma yo ne vell desirar les, que ili mey perder ti merite per li frenation de su posterior evolution. »

Li tchec occidentalistes es tre grat al sr. Karel Scheinpflug pro su bell paroles pri Occ. e ili have li firm fide, que su auxilie va aportar nos bon fructes. Pro que sr. Scheinpflug es un bon conosset tchec scrittor (autor de 5 romanes, 5 dramas, 5 libres de racontas, 3 libres de poesie, 3 libres viagiatori, 3 libres de studies e essayes) yo ha fat ti ci brevi resumption de discussion, quel evocat in nor land viv ecó.

Jaroslav Podolsky (Tchecosl.).

LI QUESTION DEL PREFIXE -IN

Ante poc mensus, noi recivet un lettre de un membre del Academie de Ido, lettre de quel noi discusse tre voluntarimen li objectiones, nam ili monstra un spiritu apert, desiros conservar li libertá de opinion. Ti lettre di :

« Benque yo es Idist, yo atente con interesse li altri systemas. Yo agnosce que li principies de Occidental completmen difere de tis de Ido. Yo prefere Ido, ma yo ne asserite que Ido es necessimen li plu bon lingue. »

Poy ti Idist explica quo il reprocha a Occ. :

« Li usa de « in » quam prefixe de negation e quam prepositional prefixe tende efecter hesitationes. Por exemple quo significa « noi va far incassar it ». Pos meditation, yo concludet que ti frase significa : « noi va far it metter in li cassa ».

Li duplic signification del prefixe **in-** es evidentmen regretabil, ma ne Occ. ha inventet it. Ti duplic signification existe ja in li international vocabularium. Li autor de Occ. ne credet haver li jure vicear ti paroles ja conosset per nov fabricationes, quam fat Zamenhof e Couturat. Il solmen dat precios regul por distinyer ti du significationes. In facte, un atentiv examine monstra que li prefixe **in-**, significant li contrari, trova se solmen ante adjectives : *nocent, in-nocent, valid, in-valid*, etc. durant que **in-** preposition servi formar verbes. Si li autor del lettre vell har apertet un quelcunc clave de Occ. u ti regul es indicat, il ne vell har questionat se pri li signification de *incassar*.

In fund li objection apari strangi quande on save que D. di : *ein-kassieren*, E. *encash*, F. *encaisser*, S. *encajonar*, I. *incassare*. In li national lingues li prefixe es li preposition e ne have li signification del contrarie ; tande nequi va hesitar in Occ. In revancha Ido postula *en-ka-sig-ar*, con un sufixe **-ig**, quel existe necu !

Ma reprimende li question secun un vise-punctu general noi posse asserter que it es impossibil evitar li duplic signification del prefixe **in-**, **pro su presentie in un masse de international paroles.** E li Idistes, quel ne vole admitter it, forsan ne remarca que **ti duplicità existe in lor propri lingue ja in mult paroles.** Ma pro que ili ne volet agnoscer ti duplicità in lor grammatica, ili esset obligat adopter li international paroles quam **nov radicas.** Talmen **ili have du radicas u Occ. forma regularimen li international derivates per su afixes.** Vi quelc instructiv exemples quel yo submissee a lor meditation.

Ido have *brakio* e *embracar* (!) (Occ. = brass, in-brass-ar), *barko* e *embarkar* (Occ. = barc e in-barc-ar), *bosko* e *embuskar* (Occ. = bosc, in-bosc-car), *trabo* e *entravar* (trave, in in-trav-ar), *paliso* e *empalar*

(pal, in-pal-ar), *duk̄tar* e *induk̄tar* (duct-er, in-duct-er), *filtrilo* e *infiltrar* (filtre, in-filtr-ar), *flamo* e *inflamar* (flamme, in-flamm-ar), *globo* e *inglobar* (glob, in-glob-ar), *kas̄o* e *inkasar* (cassa, in-cass-ar), *klozar* e *inkluzar* (clud-er, in-clud-er), *k̄rusto* e *inkrustar* (crust, in-crust-ar), *okulo* e *inokular* (ocul, in-ocul-ar), *tono* e *intonar* (ton, in-ton-ar), *toxiko* e *intoxikar* (toxic, in-toxic-ar), *ondo* e *inundar* (unde, in-und-ar), *vagino* e *invaginar* (vagin, in-vagin-ar), *briko* e *imbrikar* (bric, in-bric-ar), *karno* e *inkarnacar* (carne, in-carn-ar).

On posse questionar : Si li preposition es **en** in Ido, pro quo on ne di simplicmen *barko*, *em-bark-ar*, *trabo*, *en-trabar*, etc., etc. Li response es droli : pro que secun li « logica » de Ido, on es obligat adjunter li sufixe **-ig-** : *em-bark-ig-ar*, etc. E pro que ti derivation risca genar, Couturat preferet **un duesim radica** « *embarkar*, *inglobar* », etc. e par un culmine de inconsequentie, il adoptet les un vez con **en-** un vez con **in-** tot arbitrarimen !!!

Ti precedent exemples concerne solmen **in-** quam preposition, ma in Ido on trova anc un serie de paroles u li **in-** del contrarie existe sin esser agnoscet ! Por exemple : *finar* e *infinita*, *valida* e *invalida*, *potenta* e *impotenta*, *perfekto* e *imperfekto*, *moblo* e *imoblo*, *diferenta* e *indiferenta*, *ferma* e *infirma*, *nocanta* e *inocenta*, etc. Ma durant que in Occ. li duesim parol **deriva se regularimen del unesim** (ex. : *nocent*, *in-nocent*, *valid*, *in-valid*, etc.) in Ido on es obligat aprender du radicas sovente incoherent. Ples notar por exemple : *finar* e *infinita*, durant que Occ. di *fini-t* e *in-fini-t*.

On constata do que in omni casus, Occ. solue li question mult plu regularimen a plu simplicmen quam Ido. E noi repeti que in practica, nul confusion eveni. Noi defia quincunc trovar in li annus de Cosmoglotta un sol frase u li duplic signification de **in-** causa miscomprende. E mem si un confusion posse evenir, it vell esser facil metter li accentu sur li **in-** del contrarie o usar exceptionalmen **non** o **ne** vice **in**.

Exter ti objection, nor corespondent idist regreta ancor que Occ. have **de** por li tri casus u Ido usa **da**, **de**, **di**. Ti reprocha, noi ne agnosce quam just, pro que noi ancor memora que, in li epoca quande noi esset Idist, noi sempre hesitat inter li tri prepositiones. Ti distinction inter tri significationes esset por nos mult plu un gena quam un avantage. In ceteri noi reinvia nor letores al articul de sr. Federn quel tracta ti question sub li titul « *Por quo on fa exemples* ».

E nu, noi exhorta nor corespondent examinar nor argumentes con cuida. Noi es pret developar les si nor response ne satisfa le, pro que nor grand desira es trovar li verita, li ideal systema, quel posse conten-
tar omni interlinguistes.

R. Bg.

Li cobold marin

Yo posedet ancor un pantalon lacerat, un jackette disfrangeat e li caskette mordet del tempe. Con grunient stomach yo marchat sur li rut infinit in li sole aciecant, e in fine arrivat in ti statu miserabil, con mal humore e tre fatigat, in Nizza.

Li vision de un litt carbon-nave anglés in li porto reviventat me per bellissim esperantie. Yo nettat mi sapates e vestimentes del polve, lavat me ye un bronn e abordat li anglés vers clocca six in vésper.

Li logi del marineros esset abandonat, e un poc deceptet yo regardat al obscur chambre del calentatores. Pos quelc momentes mi oculos hat acostumat se al obscurità del angust e bass chambre, e yo videt un obscur figura sedent sur un banco ye li long strett table : un calentator quel meditat ta, sin vider me, sordid e fatigat, tal qual il hat surtit ex li calentatoria. Yo tuchat su epol e dit alt : « Hé, calentator ! »

Il manet in absentie mental. Yo sucusset le. Tande su facie levat se vers me, yo videt in li tenebre solmen li blanc del oculos terrificat pro reconosser, malgré tenebre, un facie extran. Levante se il questionat con timore : « Quo Vu desira ci ? » Yo sedentat me, racontat mi historie e mentionat que un impertinent fame molesta me. Il presentat se quam unesim machinist del nave. Yo regardat le e pensat « strangi » ! e yo tacet, que yo hat esset mariner.

Il pussat un teiere e un tasse a me, pan blanc, e un platil de lad con carne rostat. Durant que yo manjat, il dit, que on deve controlar e exslammar intern li caldron calentatori de styrbord. Deman matin ti caldron va esser sufficientmen afrigidat ; esque yo vole auxiliar ? A mi objection, que yo ne posse repter in li caldron con mi vestimentes, il promesset prestar me un veste de labor. E il levat se e dit, subitmentemente : « Ta, ta, ples dormir in li cabine del... del calentator ! » il fat un signe e surtit.

Yo desvestit me, intrat in li cabine e bentost dormit... Subitmen joyosi voces masculin avigilat me : « Jonny Bliess ha revenit ! » — « Hal-lò, Jonny ! » Astonat yo regardat ex li cabine. Tande, in li luce crepusculant del lampe de petroleo, morit li joya del calentatores, quel just hat venit de terra. Stupefat ili regardat me. Yo les dit, que li unesim machinist ha assignat me ti cabine, pro que yo deve auxiliar le deman.

Ye li matin secuent, li unesim machinist avigilat me. Il me dat un veste de labor, yo devet hastar trincar café e strax venir al calentatoria. Ta il dat me un micri meche-lampe brulant e un martel. Durant que noi ascendet al apertet « intrada por persones » del caldron de styrbord, yo questionat le, pro quo li tot equip del nave, exceptet il self, esset sur terra. Il ne respondet e reptet tra li intrada in li obscur caldron. Yo le secueta, e in li debil luce del fuliginant lampette noi martelat li incrustament del flamm-tubes.

Pos li pause de midi, quande noi denove martelat in li caldron, il frappat me per li manu sur li epol e questionat me, ca yo ja ha audit pri li calentator Jonny Bliess. Pro curiosità yo dit no. E noi continuat martelar... Pos quelc témpor il dit, regardante in li flamme del lampe : « Do vu ne ha audit pri to ?... Ti affere ancor havet bon fine ! Ma yo conosse un altri nave, u li unesim machinist pos li martelada ha obliviat in ebrietà retrorepter quam ultim in li caldron por controlar ca ancor esset un mann in it. E quande li nave poy esset in mar, on dit que un calentator ha desertet. Ma durant li long viagie, li machinist havet li tacet idé, que... Ma it ancor havet bon fine. E vu ne ha audit pri to nequande ancor ? » Yo dit no, e martelat e martelat, e devet continui-men pensar al calentator Jonny Bliess.

Subitmen yo audit li aqua violentmen precipitar se in li caldron. Li unesim machinist hat desaparit. Yo climbat al flamm-tubes superior. Mi respiration cessat pro horrore : yo ne plu videt li intrada. Yo reptet a-proxim e sentit que li covriment del intrada stat solidmen adscruvat. Yo friget pro horrore. Rapidmen yo descendet inter li parete del caldron e li flamm-tubes al unesim intrada. Ma it ja esset covrit per li aqua caldronal intrant sin cessa.

Denove yo climbat ad up e frappat e frappat per mi martel contra li parete del caldron, por far attentiv pri me. Yo frappat e frappat. Li frigid aqua caldronal ascendet ; ja it compresset li aer, til que mi lampe extinyet se ; e mi martel, per quel yo frappat con plen fortie in timore mortal, devenit plu pesant in li aer compresset, sempre plu pesant...

Subitmen me captet li sentiment suffocar. Mi forties perdit se : li martel cadet ex mi manu. E jacente sur li flamm-tubes, con subit joya pri li pensa, que yo ne va esser bollit in plen consciosità, yo evanescet.

Yo avigilat me in un cabin in li chambre del calentatores. Un calentator racontat me :

« Mann, joya te ! Yer noi omnis devet ear a terra, e li judicie questionat nos quo noi savet pri li suspectibil disappearance del calentator Jonny Bliess. Un de nos hat dit che li officies, que il suspecte li malicios trincaci unesim machinist. Tu comprende ? E quande noi retornat del interrogation judicial, noi eat in li calentatoria. Li unesim machinist ja hat cludet li caldron e comensat plenar it per aqua. Noi devet lentmen calentar it. Tande yo audi plurivez, tut incliar pro li brui del aqua-pumpes — yo audi tal frappada, quam si li cobold marin trova se ye bord. Yo attente e audi it ancor plurivez, e just in li caldron. Yo di al unesim machinist, que li caldron ne es in órdin : li cobold es in it. Li machinist ride, poy il self escuta ye li caldron e di : ti frappada ne es causat del cobold, ma per que li aqua intrant choca li zink-platte pendent in li caldron contra li flamm-tubes. Ma yo ne volet creder to.

Do yo di al calentator quel suspecte li unesim machinist, que li caldron va certmen exploder, jà li cobold es in it. Mi camarado escuta al caldron ; anc il audi li frappada e strax stoppa li pumpes. Il prende li machinist e jetta le in li càmera del lane nettatori. Yo raffa li foy desub li caldron. Poy noi rapidmen descruva, li covriment del intrada superior del caldron, noi luce in it, e strax extrae te. Si yo ne vell har credet que li cobold frappa in li caldron, tu nu ja vell esser bollit. Li unesim machinist ha confesset pos su arrestation que il tande ha obliviat vocar Jonny Bliess ex li caldron... e pro que il apprendet de te, que noi ne save to, e pro que il ha fat se suspectibil che te per ti historie, il volet cocinar anc te ! »

Luis Tadde. — Autorisat traduction por Cosmoglotta
de Cinta Ro.

Li batysfere. — Ti apparate ha esset recentmen inventet de William Beebe, chef de servicie in li zoologic parc de New-York. It consiste in un cav sfere in tre dur stal, con un diametre de 1,50 m., e possent contener du sident persones, quel penetra in it per un fore just suficient. Tri rond fenestres constituet per spess lamine ex quartz permisse li observation e li luminosi projectiones. Special scientific instrumentes absorbte li carbonic gas e li vapor de aqua exhalat del respiration. Ad-plu on trova in it un tub de compresset oxygen.

In li region del Insules Bermudes on ha descendet li batysfere til 1000 m profund, e sr. William Beebe videt inter altris, ye 815 m profundore, un cetacé opisc de 6,50 m long et 2 m spess.

Pos un cert profundore li obscurità es complet, ma li animales es tamen visibil pro li luminosità de lor fotofores.

Un nov mestiere. — Recentmen morit in Liverpool un sr. William Stone, quel hat exercit un mestiere probabilmen unic e inconosset ante il. Un die quande il promenat sur li caye, questionante se quo il vell posser far por ne morir de fame, un mann venit propositir le ganyar 10 shellings. Pro que ti mann havet un afere tre urgent in altri loc, il petit Stone far signes de amicità e de adio a un dama quel esset sur li deck de un departent nave, til que ti nave esset exter vide.

Durant un demi-hor Stone agita brasses e nase-linette e pensa que to es un medie tre facil ganyar 10 shellings ; pro to, desde ti moment il oferta su servicies de fator de signales al persones quel accompania un amato o amata o quel trova tro fatigant sempre agitar li brasses por li viaggiator.

Bentost li mestiere de Stone es conosset, il ne plu besona solicitar li clientes. Il recivet sempre revenües e su morte esset mult regretat de un clientela ne embarassat de sentimentalità.

NAVIGATION

(*Ti vocabularium ha esset composit de Sr. E. de Wahl, quel esset, quam on save, officero de marine.*)

Naves : Marine, flotta, escadre, navie, — nave (ship) segl-ero, galera, fregatte, corvete, tri-mast (-nave), brigg, brigantine, scune, scune-brigg, ketch, cuttre, yawl, yacht, barca, plen-seglero, lugre, chalupe, bote, barcass, demi-barcass, balen-ero, yoll (canoe), canu, gondol, piroga, piroga con exteron, motor-nave, vapor (-nave), vapor-barcass, motor-bot(e), bot salvatori, bugser-nave, bugsero, cabotage nave, cabotero, mercator, piscator ; — nave de guerre, cruzero, curass-iero, curass-ato, dreadnought (drednout), submarin, canoniera, monitor, clipper, aviso, wach-nave, torpedo-bote, contra-torpedero, positor de minas, distroyer ; — dragg, dragga-minas, piscator de minas, rupte-glacie, chalande, pram, glacie-ruptor.

Partes del nave : Tonnage, casco, hold (= parte intern inferiori), kil, fals-kil, costes, traves, proa (parte anteriori), bord, babord, styrbord, stern (= parte posteriori), deck, ponte de commanda, inter-pont, cabine, luca (apertura por descender) : luminator, scaliere, cabine, ruf (deck-cabine), camise del chimené, chimené, ventilator ; — mast, mastage, bom, yard, gaff, furc, nocc, topp, cap ; — topp-mast, bram-yard, super-bram-segle, focc, besan, grand-segle jib, topp-segle, scot, halse, vantes, stag, dors-stag, taclage, tacle, blocc ; cordage, amarre, line, corde, cable, caten, stoppero, anel con contrafortie ; — vinch, spill, bot-dávit, stropp, tamp, spaca ; — luv, levard, compass, bussol, pelingator, rumb, styr, styr-machine ; — caldron, foy-iere.

Ekipamentes : ancre (mort ancre, ancre drivant), boye, sonde, plumb, reme, paddle, payaye, flagg, flammette, virette, ducdalb, pilare ; nod, pumpa, logg, logg-line, mecanic-logg, cintura de salvation.

Mare : Ocean, lago, fluvie, in-bocc-atura, aqua, unde, nivell, nivell del mar, marea, alt, bass marea, flut e reflut, mare-ada, mar-scum, undi-ruptie, bass-fund, sand-banca, riff, spruzz-scum, clapotagie, mudd, acalmie, brise, vent, storm, squall, bur-rasc, tempeste, — alga, sargasso, plancton, zoostere, fuc.

Porto : molo, de-barc-ator-ia, rade, caye, ancor-age, doane, cran, helling, slip, dock, scluse.

Homes de mar : ekipage, eleve de nave, marin-ero, matros, mastro, secund mastro, aspirant de marine, styrmann, timon-ero, navigator, pilot, patron, capitan, commandant, sub-commandant, wach-officero, admiral. — Pirat, corsaro, — piscator ; stivator, cargator, post-mastro, dispatchero.

Nautica : regatta, navigation, cabot-agie, commercie maritim, armament, manovre, torn, virage : — prise, spolie, rapt-alya, capt-age, abordage, croc de abordage, piraterie, naufragie, havarie, — log, transport-polis, conosse-ment, fret-lettre, bodmerie, dispache.

Adjectives : mar-in, maritim, naviga-bil, ocean-ic, trans-ocean-ic, trans-mar-in, ultra-marin, fluid, naufragi-ant, malad ye mar, nause-at, clar, in-clar, vir-aci, luv-aci.

Verbes : *Li undes posse* : fluer, evaporar se, marear, scumar, bollir, fluctuar, undear, ricochetar, gurgulear, torder e curvar se, precipitar se, chocar, clapotar.

Li naves posse : seglar, navigar, cruzar, luvear, girar, bordear, capear, virar, naufragiar, tuchar li fund, venir sur bassfund, sur grund, aluvar, levardar, bugserar, draggar.

Li marineros posse : pilotar, fretar, armar, abordar, ekipar, navigar, seglar, stivar (al caye), cargar, charjar, mannar, tornar, verter, hissar e abassar li segles, reffar, taclar, sondar, pelingar, splissar, transbord-ar, trans-bord-ear, piscar, salar, naufragiar, a-fund-ar, descender, sub-ear, a-grap-ar, a-croc-ar, flamar, vagar, halar, amarr-ar, securar —, filar —, aleviar —, lassar ear —, mollar un corde.



IALA VA STUDIAR LI DERIVATION

I. Conferentie in Copenhag

In fine de august 1936, IALA (International Auxiliary Language Association) arangeat in Copenhag un Conferentie por interessar linguistes, queles in sam témpor havet un congress, al problema del Lingue International. IALA hat confidet li preparation del materiale interlinguistic, servient quam information e base, al esperantist prof. Collinson, un de su functionarios. Nor letores va memorar le ex su polemica contra Occidental, « *Some weak points of Occidental summarized* », e li response de sr. de Wahl in Cosmoglotta 1935, p. 17.

Six systemas lucta in li semifinale por li monopole del Lingue International : 1. *Esperanto I* (Zamenhof) ; 2. *Esperanto II* (Saussure) ; 3. *Ido* ; 4. *Novial* ; 5. *Occidental* ; 6. *Latino sine Flexione*.

Por chascun del lingues esset fat textus comparativ, tabelles comparativ del conjugationes, del numerales e questiones pri témpor e età, del radicas de origine germanic e slav.

It esset un ampli labor fat per un accuratess, conscientie, amore al cose, e in mult casus con minuciosi detalies, por quel on debi a prof. Collinson sincer mersi.

In omnicos, quo su labor positivmen contene, prof. Collinson ha observat un neutralità perfect. Benque Esperantist, il ha resistet al tentation preparar li materiale talmen, que it posi li propri systema in luce special.

Tamen on vell posser questionar, esque IALA in li interesse de su prestige de neutralità, ne vell har actet plu bon, ne just exposir un representant de un systema a tal tentationes e eventual reprochas de altri systemas. Probabilmen it departet del consideration que ti linguistes, queles ancor ne ha fixat se sur un decidet opinion pri li question del L. I., generalmen es laicos pri ti tema.

Noi repeti que noi altissimmen admira li cuida pri detalies, specialmen in li numerales queles sol plena un tot caderne. In li synoptica pri radicas de origine germanic o slav on vell in quelc casus posser discusser li leyitimità del attribution, li gradu del similità. Ma to ne importa.

Ma nor vise-punctu es absolutmen different, si noi considera li labor de prof. Collinson secun su completità, si noi considera lu negativ : i. e. to quo prof. Collinson ne ha tractat :

In li ampli materiale, quel tracta li numerales, li conjugation, li questiones pri témpor e età con un abundantie de detalies, noi ne trovat nul capitul, nul parol, ni un mention pri li DERIVATION. It es quam si ti problema ne existe. To es astonant pro que li problema del derivation es un question cardinal, in li decision pri li valore del singul systemas de lingue international.

Ma noi savet to antey. Advere Tallinn dista ye tri dies postal de Copenhag. Li materiale de prof. Collinson esset distribuet li 26. august, midí. Tamen sr. de Wahl posset predir me ja li 8. august in un lettre in quel il petit me representar le in li conferentie in Copenhag, que **li capitul « derivation » va mancar in li materiale de IALA.** Yo es convictet, que prof. Collinson e sr. de Wahl va posser jurar, que ne li un de les ha communicat ti conossentie al altri!

Ante li conferentie yo petit li pretti secretaria pri li materiale ; yo time, mi impatientie ha genat la. Illa respondet, que it va esser distribuet plu tard.

In li discussion yo presentat me quam representant de sr. de Wahl e Occidentalist (in fact yo esset ni functionario de IALA ni partiprendent al congress de linguistes) e parlat — in Occidental — pri li necessità del derivation, e que sin it omni studies vell esser incomplet.

Prof. Debrunner, li president, esset tam amabil, ne interrupter mi litt discurs. Ma poy il interdit usar un lingue international in li conferentie quam inadmissibil propaganda ! Per to noi perdit li occasion audir prof. Collinson parlar Esperanto. Noi regreta to. Noi es convictet, que li present linguistes vell har audit con interesse, qualmen Esperanto sona in practica.

Midí, li materiale esset distribuet. Nor « clairvoyant » in Tallinn havet rason : **li derivation mancat !!!**

Pos un discurs pri questiones del vocabularium, li discussion devet continuar. Li president, prof. Debrunner, questionat qui desirat li parol. Pos que nequi ne hat annunciat se, yo in fine levat li manu. In ti moment prof. Debrunner dit, que **desde nu solmen linguistes** (i. e. membres del linguist-congress) **mey parlar !** Per to it esset me impossibil parlar pri li derivation, nam in fact, yo esset li unic present non-membre del linguist-congress.

Nor eminent coidealist prof. v. Sydow mentionat que li derivation manca in li materiale. Prof. Debrunner replicat : que ti question es tro complicat (!) que it ducte tro for (!) que ne esset témpor tractar it, que it es un tema desfacil, quel postula long studies special. Noi consenti a to : sr. de Wahl ha laborat durant 30 annus por dar it li solution, quel hodie por nos sembla tam simplic e self-evident.

Questionat de prof. Collinson, esque on recomenda a IALA far studies pri li derivation, li assemblé respondet affirmativmen.

Por li casu, que IALA vell denove confider al Esperantist prof. Collinson preparar li studies pri li derivation, yo vell posser dar le alcun suggestiones pri qualmen executer ti labor practicalmen. **Li interdiction parlar impedit me in li conferentie.** Pro to yo exposi solmen hodie ci li opinion occidentalistic :

Noi ne demanda ni expecta, que IALA refà in un o du annus li labor, por quel sr. de Wahl besonat triant. Noi solmen desira, que li

resultate de su labor, incorporat in Occidental, **mey esser comparat con li systemas derivativ del altri mundlingues in sam maniere quam prof. Collinson ha comparat li numerales, conjugationes e radicas.**

In fact, li derivation es un problema cardinal, **LI PROBLEMA CARDINAL** : Nam un radica posse producter til 10 e 20 derivates, e **UN** sufix destina **MILES** de paroles. Li systema de derivation es decisiv por li aspect del paroles e del lingue.

Ilmari Federn, secretario del Occ.-Academie.

UN NOVITA IN LI VIVE INTERLINGUISTIC

Apertente li esperantic revue *Suda Kruco* editet in Australia (nr de august 1936) noi havet li surprise vider reproductet in Occ. du articules extraet de *Cosm.* con li sequent indication : « *La bele presata, arte ilustrata « Cosmoglotta » estas havebla unujare kontrau, etc.* »

To sembla poc, ma in realita to es un revolution : desde circa 15 annus, *Cosmoglotta* es inviat a omni conosset esperantic revues ; sempre it cita e discusse li opinionones esperantic. Nu ! nequande til hodie un sol redactor esperantic citat solmen 5 lineas in Occ. ; nequande on fat nos li honor mentionar li labores de E. de Wahl (except un vez li revue *Heroldo de Espo*). Un silentie obstinat, total, quam si noi vell habitar li lun. E tamen nor confratres esperantic save bon que Edgar de Wahl es, pos Zamenhof e Grabowsky, li triesim autor de un brochura in Esperanto, do hodie li max ancian autor esperantic. Ili save que li sol modificationes fat de Zamenhof a su Esperanto pos li publication de ti lingue in 1887 es debit a de Wahl, quel signalat strax un important erra : li unesim edition de *Doktoro Esperanto* dat li corelatives de tempor *kian, tian, cian, ian, nenian*, queles posset esser confuset con li accusativ de *kia, tia, cia, ia, nenia*. Pos li observation de su colaborator de Wahl, D^r Zamenhof corectet ti defecte de su tabelle, in li duesim edition, a *kiam, tiam, ciam, etc.*

Anc li grand « *Histoire de la langue universelle* » de Leau e Couturat, aparit in 1901 e reeditet in 1907, signala mult vezes li crescent influentie de Wahl e su labores incessant. Nul interlinguist serios posse do ignorar li importantie del autor de Occ. On perceptive do que li silentie Esperantic es intentionat, presc organisat : Occ. es un concurrent dangerous, plu dangerous hodie quam Ido. Probabilmen li « *Suda Kruco* » ha ja ricevet de omni lateres bell sermones indignat pri su impardonabil « naivita » !!

It es ver que li « *Suda Kruco* » ne sembla esser tranquil pro su audacios innovation e strax excusa se tamen : « *Cosmoglotta kiu uzas propran apartan vortaron, farighas, malgrau tio, tre interesa.* »

Quant delicios explication ! Li « *malgrau tio* » es un poema ! Un propri apart vocabularium ! No, car confratre. **Li vocabules de Occ. ne es propri, ni apart, ili es li ver vocabules international**, precismen tis quel Esperanto desdesignat e remplazzat per su propri fabricationes. E pro que vu lee *Cosmoglotta*, noi ne besona citar vos exemples. Ples questionar quelcunc profan por saver quel es li ver parol international : *Australujo* o *Australia*, *bedauro* o *regret*, etc., etc.

« *Malgrau tio* » noi expresse al « *Suda Kruco* » nor max calid mersias por su coragie e su generosita quel nequande va esser obliviat in nor ranges. R. Bg.

NOV PRECIE de abonnement a *Cosmoglotta*.

Fr. 3.50 sviss ; Fr. 17.50 francés ; RM 2.10 ; Kc. 22.— ; 0,80 dollar 3 s. 4 d. ; Fr. 22.— belg ; fl. 1,5 ; dan. kor. 3.60 ; sved kor. 3.20 ; Lira 14.— ; öS 4.30 ; 12 respons-cupones.

CRONICA

DECISIONES OFFICIAL DEL OCC-UNION. — Per circulare del 12 oct. 1936, li Central-Officie informa li membres del Occ.-Union pri li resultates del ultim votation concernent tri different objectes :

1. Es nominat quam membre del Senat secun majorité : Sr. **Akerman** de London, Sr. **Eschenasy** de Craiova Rumania), Sr. **Pigal** de Wien, Sr. **Ramstedt** de Helsinki.

2. Es nominat quam duesim vice-president del Senat per unanimita del voces : Sr. Dr **Sjöstedt**, de Oestersund (Svedia).

3. Es adoptet quam provisorio insigne de Occ. til 1942 **li tilde in li circul**, secun li dessin publicat in Informations n° 1 de 1936.

ACADEMIE DE OCC. — Esset nominat definitivmen quam secretario : Sr. Ilmari Federn, de Kopenhag. — In present, li Academie mult labora por fixar detalies del lingue, e formes til nu in experimentation. Li votation eveni per li metode Pedersen quel ha just esset adoptet. Noi va raportar li proxim vez pri li decisiones fat. Du nov membres va esser nominat.

Ortografie de Occ. — On ha forsan remarcat que desde un annu li ortografie usat in Cosm. ha un poc variat. To esset intentional. Occ. ne es basat sur principies a priori e ne vole imposar e decretar deplesent formes. Ma por conosser li ver gust del publica, li regules max facil por li aprendentes, it es necessari dar pluri formes. Concernent li duplic consonantes, specialmen, noi presentat successivmen li ortografie historic poy simplificat.

Hodie, pos suficient experientie, it es possibil far se un opinion. Noi es obligat constatar que malgré li exemple dat de Cosm., e contrarimen a to, quo pretende li Espolidistes, li natural tendentie es vers li ortografie del grand lingues de civilisation. On scri plu instinctivmen *occasion* quam *ocasion*, *different* quam *diferent*, etc. Evidentmen nor experimentation causat un cert confusion in nor ranges durant quelc tempor, ma almen it ha permisset constatar que li duplic consonantes in mult casus es plu un avantage por li aprension e li usation del lingue quam un gena.

E nu li ultim parol apartene al Academie quel va bentost decider. Strax pos votation, Cosm. va naturalmen conformar se al decisiones oficial.

A. P. I. S. Li ASSOCIATION POR INTERNATIONAL SERVICIE de quel li scope es analog al U. E. A. del Esperantistes es nu organisat. Just esset publicat su statutes in 14 paragrafes, con un Code de abreviationes secun li decimal classification international. On posse demandar it a Chapelle con un carte de adhesion, queles es inviat gratuitmen a omni interessate.

A. P. I. S. anc organisat special sectiones :

1. **Occidental-pressa** (abreviat : OP) Servicie de textus por li propaganda de Occ.

2. **Servicie de corection de traductiones** (abreviat : SCT).

3. **Servicie de ilustrat lettres circulant** inter instructores e professores (abreviat : ILCI).

AUSTRIA. — In octobre 1936 aparit li N° 4 del *Mitteilungen des Hoerbiger-Instituts*, li conosset Institute astronomic e tecnic de Wien. Ti revue, quel es sempre almen interessant por omni scientistes, publica li ultim calculationes e constataciones astronomic : *Movement del cosmic corpores in resistant medie.* — *Parabolic velocita.* — *Coeficient del orbital contraction.* — *Contraction del planetari orbites.*

Omni articules es resumat in Occ. Ti revue es do li unesim e successosi prova de introduction de Occ. in li scientic circules. — On posse obtener it che *Hoerbiger-Instituts*, *Braunhubergasse, 23, Wien XI, Austria.*

Durant septembre, octobre e novembre 1936 eveni in Wien reuniones public por conversationes pri e in Occ., sub li duction de Sres Janotta e Deminger, membres del Occ.-Academie. — Curs de Occ. es poy organisat.

ITALIA. — Desde 1925 existet in Italia un "Italian Uniono por l'interlinguo Ido" de quel li fundator esset Sr. Lusana (hodie mort), li vice-president Dr Guidi, li secretario Dr Dal Martello. Hodie, pos har studiat completmen li problema actual del lingue international, Sr. Dal Martello, auxiliat de Sr. Guidi, decidet adherer a Occ. e fundar un *Société italian por li propaganda de Occ.* Anunciante al Idistes su conversion, Sr. Dr Dal Martello declara inter altri :

"...Yo ha studiat seriosmen li Occ. systema de derivation linguistic de Wahl e yo trova it vermen superior de linguistic vise-punctu, pri naturalità e fluentie (particularmen in poesie !) e yo constata que su propaganda in Italia es justmen plu simpaticmen acceptet... Li derivation-systema de Occ. es mem plu logic quam ti de Ido, ma principalmen Occ. posse haver vast diffusion e application, sive inter erudites, sive inter non-erudites, durant que Ido (to es melancolic experientie de omni sincer idiste) quam Esperanto, ne have egal simpatie e success inter li plupart del erudites."

Dr Dal Martello comensat su propaganda de Occ. per li edition de un "Corso in 5 lezioni per corrispondenza". On posse obtener it che Sr. Ing. Emilio Dal Martello, Grisignano di Zocco, Vicenza, (Italia).

RUSSIA. — Por nor coidealistes de Russia noi fa memorar que it existe ja un clave russ de Occ., con un curt vocabularium, clave quel ne es indicat in nor catalog. ma quel on posse obtener che li administration de Cosmogl.

SVISSIA. — Un nov revue ilustrat "*Der helvetische Kulturkreis*" publica in german e **in Occidental** mult alt interessant studies pri economie e etica. Per it es Occ. introductet in un nov e actual dominia. Li numero 2, quel just aparit, contene un demonstration del regules de Occ., scrit de Sr. Walter Graber, cand. phil. On posse abonner li revue che : *Institut für Individual- und Umweltforschung, Casella postale, 55, Chiasso, Svissia.* Precie de abonnement : Sviss 6 fr. per annu.

In octobre, nor coidealist Sr Moeckli de Zurich comensat li propaganda in li **radio-circules** per inviation al amatores sur curt-undes de circulares in frances, german e Occ. Pos har explicat li superiorita de Occ., Sr Moeckli invita li possessores de emission-apparates provar Occ. e da exemples de textus con li pronunciation e accentuation. Ti materiale posse esser obtenet che *A. Moeckli, Guthirtstr. 11, Zurich 10.*

TCHECOSLOVAKIA. — Li labor e li organisation del Societé Occ. de ti land posse esser dat quam model al altri coidealistes. Li ultim Bulletin de nor amicos tchecoslovac aporta nos un quantita de informationes tro long a citar. Li jurnales *Pritomnost, Nezavisla politika, Kraj* continua publicar articules o curses por Occ. — Specialmen li revue *Kraj* desirat publicar textu comparativ de Espo-Occ., ma devet renunciar pro que circumflexat literes por li version Espo esset introvabil ! Tamen li lingue tchec es li max rich in literes accentuat de omni manieres !

Li **Vocabularium tchec-Occ.** ha just aparit. It es un elegant brochura de 80 pagines, contenent 4500 vocabules, e composit de Sres Kajs, Svec e Podobsky. Precie Kc 8.—. On posse comendar it che : *Aug. Seidl, Libreria Occidental, Praha VII Korunovacni, c. 20.*

Esperanto als Welthilfssprache. — Li Institute Occidental just ha editet in german sub li Nr. 125 D., in 7 pagines, formate 210 x 297 mm., per duplicator, li studie de sr. de Wahl ja aparit in anglès (Nr. 125 E.) con li titul "Arguments against Esperanto" (Argumentes contra Esperanto). Li german traduction ha esset iat per sr. Ilmari Federn, li activ secretario del Occidental-Academie.

Ti important document va esser max util por li Occidental-propagandistes.

Precie : Doc. 125 D., 125 E., singul S. Fr. 0,20 li exemplare.

CATALOG

Publicationes in frances :	Afrancat
L.-M. de GUESNET : L'Occidental (principes de la langue)	SFr. 0.30
* Qu'est-ce que l'Occidental ?	" 0.30
* Aux Espérantistes	" 0.30
BERGER : L'Occidental en 5 leçons	" 0.40
* — Dictionnaire Français-Occidental, 316 p., en cahiers	" 5.—
Solidement relié	" 9.80
* — Vocabulaire Occidental-Français	" 0.50
* — Historiettes in Occidental (avec traduction française)	" 0.60
CHANAUD : Index Français-Occidental au Radicarium	" 0.80
In german :	
DIVERS AUTORES : "Occidental, die Weltsprache", 256 S. Leinen	" 4.50
Geh.	" 3.—
* BLASCHKE : Der Kampf um die Weltsprache	" 0.50
JANOTTA : Leitfaden der Weltsprache Occidental	" 1.—
OCCIDENTAL, Begründung, Grammatik, Wortbildung	" 0.50
GÄR : Wörterbuch Deutsch-Occidental. Brosch.	" 2.50
Gebunden	" 5.30
* Dr SCHRAG, Dr ASCHWANDEN, Dr NIDECKER : Die moderne Weltsprache	" 0.50
* Historiettes in Occidental (con trad. german)	" 0.60
In angles :	
* BIDDLE : Curs de Occidental por Angleses	" 0.50
— The problem of an international language	" 0.40
— Dictionarium Angles-Occidental (in preparation)	" 0.60
FEDERN : Clave Occidental-Angles (in preparation)	" 0.60
In italian :	
* J. RITTER : Curs de Occidental por Italianes	" 0.30
In ruman :	
ESCHENASY : Gramatica in ruman (in preparation)	
— Vocabularium Occidental-Ruman (in preparation)	
In sved :	
Dr C.-E. SJÖSTEDT : Occidental de internationella ordens språk	" 0.40
Mag. phil. A.-Z. RAMSTEDT : Occidental, ett västerländskt kulturspråk .	" 0.30
— Nyckel till Occidental	" 0.80
Dr B. BLOME : Lärobok i Occidental, 72 p.	" 1.20
Dr C.-E. SJÖSTEDT : Dubbel Occidental-ordbok, 98 p.	" 1.20
C. W. von SYDOW : Occidental eller Esperanto	" 0.50
K. SEGERSTAHL : Hjälpsspråksfragen	" 0.40
In tchecoslovac :	
O. MULTIS : Problem reci mezinárodní	" 0.50
J. A. KAJS : Ucitel svetomluvy	" 0.50
J. PODOBSKY : Co je Occidental ?	" 0.20
In finn :	
T. TATFARI : Occidental Kansainvälinen Kieli	" 1.50
In japanes :	
Gramatica e vocabularium in preparation.	
Publicationes por esperantistes :	
Occidental au Esperanto	" 0.30
Vocabularium Esperanto-Occidental e Occidental-Esperanto :	" 0.30
Publicationes por idistes :	
Occidental od Ido	" 0.30

Publicationes in Occidental :	Afrancat
BERGER : Curs de Occ. in Occ.	SFr. 0.50
E. DE WAHL : Radicarium directiv in 8 lingues	» 2.50
De GUESNET : Manuale de conversation	» 0.40
PIGAL : Essentie de Occidental (Cosmoglotta Nr. 56)	» 0.50
DIVERS AUTORES : Crestomatie de Occidental	» 1.50
PODOBSKY J. : Li astres del Verne (original poemas)	» 0.80
JANOTTA : Julius Lott, precursor de Occidental	» 1.20
TAKUR : Nationalism in Occidente	» 1.10
* CREUX : Stenografie Duployé por Occidental	» 1.—
* — Rythmica in Occidental	» 0.60
* CREUX e BERGER : Li origines de Occidental	» 0.80
* HEINI : Li via al prosperità	» 0.50
R. ROLLAND : Europa e Asia, con vocabularium (Ovre 1)	» 0.60
K. BALMONT : U es mi hem ? (Ovre 2)	» 0.60
COUDENHOVE-KALERGI : Heroe o Santo (Ovre 3) (exhaustet)	» 0.60
POE : Un descense in Maelstrom (Ovre 4)	» 0.45
MASARYK : Democratie e Humanità (Ovre 5)	» 0.60
AMICIS : Manuel Menendez (Ovre 6)	» 0.75
GUILBERT-DEMINGER : Vocabularium Occ.- F. A. G. (por li tomes 1-6 de Ovre)	» 15.—
Ancian collectiones de Cosmoglotta. Secun li annus de fr. 2.— a	» 2.—
Ancian collectiones de Helvetia, per annu	
* Editiones mimeografat.	
Divers :	
Discos de gramofon, con agules (Textu in Occ.)	» 4.50
Lettre-paper e postcartes de propaganda, 100 ex.	» 1.30
Du canzones e tri canzones, chascun caderne	» 1.—
Prospectes por includer in lettres, 4 pagines, 1 ex.	» 0.02
Marcas glutinabil, per centene	» 0.80
Omni ti libres es recibibil de : Institute Occidental CHAPELLE (Vd), Svissia.	
Postchec-contos : London S.B.D. 18363 ; Berlin 1683 36 ; Paris 1765 46 ; Svissia II. 1969.	

COSMOGLOTTA 1936

REDACTION e ADMINISTRATION :

INSTITUTE OCCIDENTAL CHAPELLE (Vaud), SVISSIA

CONDITIONES DE ABONNAMENT. Li precie de un simplic abbonament es li correspondent valore de Fr. 3,50 sviss o 12 respons-cupones. Ti quel misse Fr. 7.— sviss recive 3 exemplares (abonnament de propaganda). Pro li fluctuationes del cambio, noi ne indica li valore del abbonament in li moné del divers landes : Li postal buro de chascun loco posse informar li expeditor. On posse inviar li abbonament al sequent adresses :

ANGLIA : Institute Occidental CHAPELLE (Vd), Svissia (pch. London S.B.D. 18363).

AUSTRIA : Occidental-Union, Ehamgasse 40, WIEN XI (pch. Wien B 84 868).

BRASIL : B. Snaider, Caixa Postal 1338, RIO-DE-JANEIRO.

DANIA : Occidental-Information, Aaboulevard 3, KOBENHAVN-V (Pch. 269.72).

ESTONIA : Kosmoglott, Eha 10, TALLINN.

FRANCIA : L. M. de Guesnet, 83, Rue Rochechouart, Paris 9 (pch. Paris 26 437).

* : Institute Occidental, CHAPELLE (Vaud), Svissia (Pch. Paris 1765 46).

GERMANIA : Institute Occidental, CHAPELLE (Vd), Svissia (Pch. Berlin 1683 36).

HISPANIA : C. Varela, Macia 5, FIGUERES (Cat.).

JAPAN : Kokusaigo-Kenkyusho, Daita II-784, Setagaya, TOKIO (Pch. Tokio 62 061).

TCHECOSLOVAKIA : Jos. Svec, Skroupova 2, PRAHA VII (Pch. Praha, Nr 9.438)

SVEDIA : Sved Occidental Federation, Box 171, STOCKHOLM (pch. Stockholm 70 315)

SVISSIA e altri landes : Institute Occidental, CHAPELLE (Vd), (pch. II. 1969).

Demanda al administration li adresses, inviat gratuitmen, del **societés national de propaganda** o representantes queles existe ja in 30 landes.